



3. februar 2010

UPA2010/148

Inatsisartut suleriaasiat § 36 immikkoortoq 2 naapertorlugu Naalakkersuisunut imaattumik apeqquteqarniarpunga:

Naalakkersuisunut apeqqutit:

- **Imigassat aalakoornartortallit nunatsinni pisiniarfinni ulluinnarni sapaatip akunnerisalu naanerini tuniniarneqartarnerisa sivisunerusumik ingerlanneqartarsinnaanerat Naalakkersuisut qanoq isumaqarfigaat?**
- **Imerniartarfinni aalakoornartulinnik tuniniaasarnerup sivisunerusumik ingerlasalernissaa pilersaarutigineqarpa?**
- **Aalakoortut pisiniarfinni imigassanik aalakoornartulinnik pisitinneqartarnerat aammalu inuusuttuaqqat 18-niliisimannngitsut pisitinneqartarnerat pillugu Naalakkersuisut inatsimmik nr. 11, 11 November 2000-imeersumik sukateriniarpat?**

(Inatsisartunut ilaasortaq Kristian Jeremiassen, Siumut)

Tunngavilersuut:

Isumaqarpunga Nunatsinni imigassamik aalakoornartulimmik tuniniaasarneq killeqarpallaartoq, inuummi nammineq killissani sumiinnerseq ilikkagassarivaa, qulaaniit naqisimaneqarnerup imigassamik atuineq annikillisinnavianngikkaa isumaqarpunga.

Kingulliaruusugut imigassaq pillugu allaanerusumik isiginnittaaseqartugut isumaqarpunga, allatut isiginnittaaseqarnermik isumaqarama pissutigivara nunatsinni killilersuivallaartumik imigassamut politikeqartugut, isumaqarpungalu imigassanik aalakoornartulinnik tuniniaasarnerup killeqarpallaarnera pissusissamisunngitsoq aammalu sivitsortariaqartoq, pissutigalugu inuup nammineq aalajangigassarimmagu sukkulluunniit imigassamik aalakoornartulimmik imersinnaanissani.

Imigassamik aalakoornartulimmik atuisarnitta ukiuni kingullerni annikilliartornera nuannaarutigivara, isumaqarpungalu imigassat aalakoornartullit sivisunerusumik tuniniarneqarlutik ammasalerpata Nunatsinni annertunerusumik atuinerusoqalernavianngitsoq, pissutigalugu ukiuni kingullerni inuit imigassanik aalakoornartulinnik atuinnginnissartik pillugu imminnut aaliangersinnaanerulersimmata. Aammalu ileqqulersimavoq annertuumillu ilikkarneqarsimalluni nammineq angerlarsimaffinni imigassanik peqarsinnaaneq sukkulluunniit annertunaarlugu imerniutiginnikkaluarlugu.

Taamaattumik isumaqarpunga qanga imigassat atugaalluaqqaalerneranniit imigassamik atuinitsinni kulturi allanngorsimasoq, maannakkullu imigassamut politikkeqarnerput ullutsinnut naleqqussartariaqartoq.